

成

實

論

書

卷八

西八

四百十四

50853



元祿九年丙子二月三日重脩

佛田塔圖
帝齋銀昌

佛田塔圖
佛田塔圖

山城州天女寺法金院置

精進會
精進會
精進會



Handwritten text or markings on the right edge of the page, including a small signature or mark.

成實論卷第八

姚秦三藏鳩摩羅什譯

西

三業品第一百

問曰經中說三業善不善無記業何等是善
業答曰隨以何業能與他好事是業名善是
善業從布施持戒慈等法生非洗浴等問曰
何名為好答曰令他得樂是名為好亦名為
善亦名為福問曰若令他得樂名為福者今
他得苦應當有罪如良醫灸針令他生苦是
應得罪答曰良醫針灸為與樂故不得罪也
問曰若為與樂便得福者如姪他妻令其生
樂亦應得福答曰姪欲名決定不善若人令

他行不善法是則為苦非為樂也樂名今樂
後樂非現在少樂以此因緣後得大苦問曰有
人飲食因緣生他人樂或飲食不消令人至
死是施食人應得罪得福答曰是人好心施
食無惡心故但得福德不得罪也問曰姪他
妻者亦復如是但為樂故亦應得福答曰此
事先答謂姪欲是決定不善生大苦故又施
飲食中有福德分所以者何得飲食者不必
盡死衆生皆以貪染心故而受姪欲全非福
因云何得福問曰有人以殺生故利益多人如
人破賊則國無患若殺毒獸則利人民是等
可以殺生而得福乎或有人劫盜因緣供養

父母姪欲因緣生好兒息妄語因緣或與壽命以惡口等令他得利是皆十惡所攝去何以此而得福乎荅曰是人得福得罪為利他故得福以損他故得罪問曰是醫亦初與他苦後令得樂何故不得罪得福而但得福耶荅曰是醫以善心針灸無有惡意若業為善

惡故起則罪福兼得問曰殺等皆是福德所以者何以殺因緣得所欲事如為王殺賊則得富貴以福因緣得隨所欲去何殺生不名為福又人能殺則得名聞名聞是人之所樂人之所樂是福德果又以殺故得喜樂喜樂亦是福德果報又經書說若逆陣死得生天上如偈

說若人戰陣死天女諍為夫又說雖善富貴
人為賊而逕前能殺則無罪不殺則得罪又
卅法經說有四品人婆羅門刹利毗舍首陀
羅是四品人各自有法波婆羅門有六法刹利
四法毗舍三法首陀羅一法六法者一自作
天祠二作天祠師三自讀圍馱四亦教他人五
布施六受施四法者一自作天祠不作師二
從他受圍馱不教他三布施不受施四守護
人民三法者作天祠不作師自讀圍馱不教
他自布施不受施一法者謂供給上三品人
若刹利為守護人民故奪他命有福無罪又
圍馱經說殺生得福所謂以圍馱語呪殺羊

羊死生天圍馱經是世間所信又說若實應
死者殺之則無罪如五通仙能呪殺人不可
言神仙有罪罪人云何能成此事故知殺生
得福又或有心力能奪命得福施命得罪若
人以善心殺生欲令得樂云何有罪如屠兒
等畜養牛羊雖施而罪如是盜等事中亦有
福德荅曰汝言殺生得所欲故名福德者是
事不然所以者何由福德故得隨所欲是所
欲事緣殺生得所以然者以先世造不淨福
故如經中說劫奪殺害得財用施令他悲泣
及不淨施如是等施名曰不淨要由惡緣而
得受報又此人先世有福亦有殺生業緣是

故今身因殺受報亦有衆生應償財命故由
殺害得隨所欲又非一切衆生皆以殺生而
得富貴如世間言是人薄福多作無獲名聞
喜樂亦復如是皆以福德因緣故得名聞身
力及樂但是福不淨故由殺而得問曰師子
虎狼等所得身力皆從罪生夜叉羅刹等得
身力樂亦從罪生荅曰是事先荅亦由不淨
福故以罪緣得汝言經書中說若逆陣死得
生天上是事不然所以者何是經以此邪語
誘導愚人令其有勇何以知之要由福生福
由罪生罪是中都無福因何由得福汝言四
品衆生各自有法刹利爲護人故殺無罪者

此如家法如屠兒等世世家法常應殺生亦不免罪利利亦尔雖是王法亦故得罪若利利以王法故殺生無罪則屠獵等亦應無罪但刹利以憐愍心為民除患由此得福若奪人命此則有罪如人劫奪他財以養父母是人則罪福兼得問曰是人劫盜以養父母不應得罪如世法經說若乏食七日從旃陀羅奪取無罪若命欲斷得從婆羅門取是人雖以惡業活命不名為破戒法人以急難故猶如虛空塵垢不汚是人亦尔罪所不染荅曰即梵志法中說若劫奪時財主來護梵志尔時應當籌量若使財主功德不如則應殺之

所以者何我是勝人能以種種悔法除滅此罪若功德與等自殺殺他其罪亦等以此罪重難除滅故若財主德勝應自捨身以此中罪有可除故如是分別劫奪殺中亦應如是又言以惡業活命是中有惡業故云何名福汝言若人逕前殺則無罪不殺得罪是言已具宗壞所以者何若前人德勝應自捨身若無罪者何故尔耶汝言圍馱經說殺生得福是言先荅謂殺無福汝言人實應死殺無罪者則殺惡賊亦應無罪又一切衆生皆是罪人以起作業受陰身故然則殺生無得罪者是事不可問曰若衆生先世自造殺緣今殺何故

得罪劫盜等業亦皆如是答曰若尔則無罪
福所以者何是人先世造殺緣故殺之無罪
離此殺生亦無福德如是若施他人亦應無
福以受者先世自行施業今自得報而實不
可無罪福故當知衆生雖自造殺業殺者亦
皆得罪以起貪恚癡諸煩惱故此諸煩惱名
邪顛倒邪倒心生尚應得罪況當故起身口
業乎故令生死無窮若不尔者則諸神仙起
貪恚等諸煩惱時不應便失神通若此非罪
復與何法相違故名福德當知衆生雖復先
世自造殺緣殺者亦應有罪汝雖言罪人無
所能成是事不然旃陀羅等亦能以呪術殺

人仙人亦亦以惡心故隨語能成又此人以
福力故能成以奪命故得罪汝言或有心力
從奪命生福施命得罪是事不然所以者何
要由心力及福因緣故能得福非但由心若
以善心姪于師妻殺婆羅門可得福耶安息
等邊地人以福德心姪母姊等復有福耶故
知從福因緣有福德生非但心也劫盜等亦
如是故知殺等皆是不善又此殺等非為利
他故名不善雖於現世少時得樂後受大苦
以損他故名不善相又現見多有衆生行殺
等法亦多在三塗及人道中受諸苦惱當知
苦惱是殺等果果似因故又三惡道中罪苦

尤劇故知以殺等因緣生於此中間曰天人
中亦如是諸天亦常與阿脩羅戰共相殺害
人中亦以坑陷網毒殺害衆生答曰天人中
有離殺等法三惡道無當知此中罪苦尤甚
又人以殺等因緣則失壽等利樂上古時人有
無量壽命光從身出明如日月飛行自在地
皆自然生隨意物自然粳米皆以殺等罪故
失如是事後轉更失至十歲人時酥油石蜜
稻粟麥等一切皆無故知殺等是不善業又
若離殺等還得利樂壽命增長如壽年八万
歲諸欲隨意故知殺名不善又今鬱單曰有
自然粳米衣從樹生皆由離殺等故取要言

之衆生所有一切樂具皆從離殺等生故知
殺等是不善業也又殺等法善人所捨若諸
佛菩薩緣覺聲聞及餘功德人皆悉捨離故
知不善問曰是殺生等善人亦聽圍馱經中
爲天祠故聽令殺羊荅曰此非善人善人者
常求利他修慈悲心怨親同等如是人者豈
當聽殺生耶是人貪恚濁心故造此經求生
天上呪他衆生以福力故能成是事又此殺
等得解脫者之所不爲故知不善問曰得解
脫者亦不作餘事謂過中食等是事亦可是
不善耶荅曰是罪因緣故善人亦捨若法無
過不應捨離過中食等能害梵行是故亦捨

有法以體性不善故捨如殺盜等有法以為不善因緣是故亦捨如飲酒過中食等故知殺生體性不善又殺生者多人憎惡如師子虎狼及諸怨賊旃陀羅等若以此法因緣人所憎惡豈非不善又若不殺者為多人所愛如行慈悲諸賢聖人所愛故知殺為不善問曰有殺生者以勇健故為人所愛如人為王殺諸惡賊則為王所愛答曰以因緣故非深愛也如說若人以惡業令主心歡喜主若生厭心反還疑此人若以惡事生疑去何名愛又行不善者尚不自愛況他人乎故知殺生是不善法又殺等法是打害繫縛等諸苦惱因

故知不善問曰不殺等法亦有苦因如王勅
人令殺惡賊若不殺者王必害之荅曰若以
不殺便被害者諸不殺者皆應當死是人自
以違王教故若知此人深心不殺則不加害
反應供養故知殺等是苦因緣非不殺等又
行殺等者死時心悔故知不善又行殺等故
人所不信於同類中尚不相信何況善人又
行殺等者尚為同類所譏況餘人乎又行殺
等者善人捨遠如旃陀羅屠獵師等又行殺
等者不名樂人如屠獵者終不以此等業而
得尊貴又善人為功捨離殺等若非不善何
故為功勤求捨離又現見殺等有不愛果當

知來世亦得苦報又若殺等非不善者更有何法名不善耶問曰若殺等法是不善者則無好身所以者何無有不殺生時若來若去舉足下足時恒常傷殺細微衆生亦常以我想而取他物亦隨自想而為妄語是故終無好身荅曰故作則罪非不故也如經中說實有衆生於中生衆生想有欲殺心殺已得殺罪盜等亦尔問曰如人食毒故與不故俱能殺人又如蹈火知與不知俱能燒人刺等亦尔當知殺生故與不故俱應得罪荅曰此喻不然毒以害身故死罪福在心何得為喻又火刺等若不覺不能生苦是故此喻不然若

無識則不覺痛有識則覺如是若無故心則業不成有心則成此喻應尔又故則有罪不故則無諸業皆以心差別故有上有下若無故心云何當有上下如醫與非醫俱生人苦以心力故罪福差別又如兒捉母乳則不得罪以無染心故若染心捉則便有罪當知罪福皆由心生又若無故心而有罪者得解脫人亦有不故而惱衆生是應得罪則無有解脫以諸罪人無解脫故又若不故而罪福則一業便應是善不善如人爲福業時誤殺衆生此業則名亦罪亦福是事不然當知不故不應有罪有福又若無心而有業者云何分

別此善此不善此無記耶皆以心故有是差別
如有三人俱行繞塔一爲念佛功德二爲盜
竊三爲清涼雖身業是同而有善不善無記
差別當知在心又有業定報有不定報有上
中下有現報生報後報等若不由心而得罪
福云何當有如是差別又若離心有業則非
衆生數亦應有罪福如風頹山惱害衆生風
應有罪若吹香華來墮塔寺便應得福是則
不可故知離心無罪福也又外道說行斷食
法卧於灰土刺棘等上投淵赴火自墜高崖
等以苦因緣而有福德智者難言若介則地
獄衆生常被燒炙餓鬼飢渴飛蛾投火魚鼈

麤水猪羊犬等常卧糞土是等亦應得福是人答言要以故心受此苦惱則有福德非不故也地獄等不以福心受燒等苦若不以故心故無福者亦以無故心是故無罪若以不故心而有福者地獄等中亦應有福有如是過又若不故心而有罪福則無善人所以者何於四威儀中常殺衆生此事不可當知不故則無罪福又亦無得好生處常為罪故而實有梵王等諸妙好身故知不故無罪福業又汝等法中食不淨食則皆有罪若深思惟一切飲食皆是不淨食皆應得罪如是觸酒等則非婆羅門若不見聞以淨心食便無罪

者當知離心則無罪福又於天祠中以福心故
殺羊令羊生天以福心殺故則有福德若不
尔者一切殺生皆得罪又婆羅門言或
有劫盜無罪如乏食七日得從首陀羅取若
命欲斷得從婆羅門取亦為生好兒故姪欲
無罪若不以故心則不應有此等差別故知
若人不故與他人毒何由得罪若故與他毒
毒反消病則應得福如施人食是食不消令
人死者是應得罪若不故而有罪福是法則
亂又世間人一切事中皆信於心如即一言
能生喜怒椎打等亦如是故知諸業皆由於
心又意業寂勝後品當說故知諸業在心又

若智慧人雖處五欲而不得罪皆是意力所以者何智者見色不起妄想故無著色之過聲等亦尔若不起妄想而有罪者一切見聞盡應有罪然則意業無用智者以智慧為首雖受五欲不生貪著五欲雖在以心猷故而能不染是非意業力耶是故無有不故而得罪福問曰汝說善不善相謂損益他是事不然所以者何若人自將養身而行福業是人自食亦有福德又塔寺非衆生灑掃亦得福又禮敬等於他無益但損他功德不應有福又非但發心故有福德隨以衣食利益他人尔時得福如是行慈悲者不應有福又若塔

寺等非衆生數若奪財物若加毀壞不應有罪又不現前惡口罵他不應有罪以不聞故何所損減又於他人但生惡心不起身口復何所損此皆不應得罪又或自罵或自殺身或自邪行亦或得罪是故善不善相非但由損益他荅曰汝言自將養身有福德者是事不然若自供養有福德者則無有人應供養他而實求福德者供養他人又隨自爲己其福轉薄故知自爲不應有福又汝言自食爲行福業若自養身爲饒益他從是心邊能生福德不由自養而得福也汝言塔寺非衆生灑掃亦得福者是人念佛功德於衆生中尊

是故灑掃此事亦由衆生故得福耳問曰已
滅度佛不名衆生又經中說佛非有非無亦
非有無亦非非有非非無云何名衆生耶答
曰若已滅度不名衆生是人念佛未滅度時
而爲供養是故得福如人祭祠父母念生存
時若不介者不名供養父母此事亦介汝言
禮敬等於他無益是事不然所以者何以禮
敬等種種利他令他尊貴人所恭敬是名利
益亦令他人隨學恭敬亦得福德又禮敬他
時自破憍慢以破不善分故多所利益亦以
顯他功德禮敬等有如是利又汝言禮敬等
損他功德是事不然以好心禮敬非如外道

爲損他故而行禮敬又如布施若他不消亦
損他功德然則布施亦不應有福故禮敬等
應深思惟有利益則行如經說有一比丘於浴
室中手摩他身佛語諸比丘此供養者是阿
羅漢受供養者是破戒人汝等當學無以師
子供養犬等汝言不但發心故得福者心提
一切功德之本若人利他已利今利當利皆
以善心爲本若人損他已損今損當損皆以
不善心爲本又行慈者以慈心果報饒益一
切謂風雨隨時日月星宿不失常度大海不
溢大火不燒大風不壞此皆慈果報力如經
中說若一切世間皆行慈心則所欲自然汝

言劫奪塔寺不應罪者是人以衆生心而劫奪之隨是何塔爲劫奪此以是因緣故若能爲損若不能爲損皆爲主故得罪若汝心謂於佛不能生惱故無罪者以惡口等加阿羅漢不能生苦亦應無罪汝言不現前罵應無罪者是事不然是人以惡心加彼以惡心故彼雖不聞若聞必當生苦是故得罪汝言若生惡心不起身口不應有罪者是亦不然是濁惡心爲惱他故生若他覺知必生苦惱如賊來奪人物雖不覺知亦爲惱人故汝言自殺自罵亦得罪者是事不然是若自苦身而得罪者則無有人得生好處所以者何人於四威

儀中常苦其身然則一切衆生常應得罪如惱他人是故無有得生好處此事不然當知不從自身有罪福也爲道因緣故毗尼中結此戒若人惡心自殺以煩惱故得罪無記業者若業非善不善於他衆生無益無損是名無記問曰何故名無記答曰是此業名字若業非善非不善者名曰無記又善不善業皆能得報此業不能生報故名無記所以者何善不善業堅強是業力劣弱譬如敗種不能生芽又報有二種善得愛報不善得不愛報無記無報問曰有此中取非愛非憎是無記報有何答答曰佛說報有二種邪身行得不愛報

正身行得愛報不說有中又福德果報得愛
念如意罪則與此相違又苦樂是罪福報不
苦不樂亦是善行果報故知無無記報

邪行品第一百一

佛說三邪行身邪行口邪行意邪行身所造
惡名身邪行是邪行有二種一十不善道所
攝如殺盜邪婬二不攝如鞭杖繫縛自婬妻
等及不善道前後惡業問曰是殺生等三不
善業但是身業性耶荅曰殺罪名殺不善業
是罪身亦可造隨以自身殺害衆生口亦可
造隨教勅人令殺衆生或以呪殺心亦可造
有人發心能令他死盜婬罪亦如是但自作

得具足罪又身不善業以身為相或口為相
或發心他則知以此因緣亦得造殺等罪但
以多是身所作故通名身業口邪行亦如是
口所造惡業名口邪行是中亦有二種若人
決定問時現前誑他是不善道所攝餘不名
攝貪恚邪見等是意邪行問曰何故十不善
道中說邪見三不善根中說癡耶荅曰邪見
是癡之異名是癡增長堅固名為邪見癡更
無別相但以顛倒貪著故名為癡問曰經中
說諸邪行得不愛報正行得愛報是愛不愛
相不決定如即一色而有愛不愛是故應辨
其相荅曰樂是愛相如經中說福報名樂苦

是不愛相如經中說汝等於罪應生怖畏以是
苦因緣故問曰若樂是愛相者豬犬等以食
糞為樂是福德果耶荅曰是不淨福果如業
經說若非時施不淨施輕心濁心非福田中如
是等施得此果報問曰若經中說正行得愛
報何故復說以正行因緣得生天上荅曰有
邪行者亦生天上或謂生天是邪行報故經中
更說正行因緣生於是中又邪行正行能得
善惡道身受身已於中受苦樂如邪行因緣
惡道中受苦正行因緣天人中受樂

正行品第一百二

身所作善名身正行口意亦尔離殺生等三

不善業名身正行離口四過名口正行離意
三不善名意正行是離三種律儀所攝所謂
戒定無漏律儀又所有禮敬布施等善身業
皆名身正行所有實語軟語等皆名口正行
不貪等意業皆名意正行是名三正行問曰
外道神仙無報得解脫戒是人能得戒律儀不
答曰是諸外道從心生戒律儀戒或亦口受又
諸餘人等亦能得戒律儀所攝正行如壽十
歲人受不殺法故生子壽二十歲問曰經中
說正行淨行寂滅行有何差別答曰有論師
言凡夫善身口意業名爲正行學人以斷結
故即此正行名爲淨行無學人斷結從無結

生語故名寂滅行又無學人畢竟不起不善業故名寂滅行如說身寂滅口寂滅意寂滅又人言此三種行義一而異名但美其質直故稱正離諸煩惱故曰淨離諸不善故名寂滅故雖三名其義不異問曰又論師言但心是寂滅行非思是義云何荅曰是三種行皆但是心所以者何離心無思無身口業問曰經中說見正行成就人則為見天若見天數非一切正行者皆生天上何故如是決定說耶荅曰言天數故是事已明正行者雖不必生天若生尊貴處則與天相似故言見天數諸正行者皆應生天或以餘緣所壞是故不

生所謂邪正雜行邪行強故不得生天如經中說

佛語阿難我見有人行三正行而生惡道是人先世邪行果熟今雖正行未具足故有臨命歿時起邪見心故墮惡道邪行生善處亦如是故凡夫法不可信也當知隨強力業受

生差別

繫業品第一百三

問曰經中說有三種業欲界繫業色界繫業無色界繫業何者是耶答曰若業從地獄至他化自在天於中受報名欲界繫業從梵世至阿迦尼吒天受報名色界繫業從虛空處

至非有想非無想處受報名無色界繫業問
曰無記業及不定報業不在此三種中耶荅
曰是業及果報皆名欲界繫所以者何此法
是欲界業果報故問曰欲界法非一切盡是
業報是故不然荅曰一切欲界法盡是欲界
繫業報問曰若尔則是外道邪論謂一切所
受苦樂皆是先業因緣又失業果報謂善不
善業有報非報又精進之功則無所用若皆
是業報復何勞功耶又若諸煩惱及業皆是
業報則無得解脫以業報不可盡故荅曰汝
言是外道邪論是事不然外道說苦樂好醜
但是先業果報然則不應復假現在因緣而

實見万物從現在緣生如種子等故不得言
一切皆從先業因緣又從因從緣万物得生
如以種為因地水空時等為緣眼識以業為
因眼色等為緣是故不同外道邪論汝言先
業果報是事不然現見從果有果相續生如
從穀生穀如是從報生報有何咎耶又如不
能男人及鳥雀鴛鴦等欲毒蛇等瞋當知皆
是先業果報問曰若從報生報是則無窮答
曰我說業報三種善不善無記從善不善生
報無記不生故非無窮如從穀生穀於是中
從種子生芽不從莖等生如是從善不善報
有果報生不從無記報生汝言不勞功者雖

從業生報要須加功然後得成如從得穀業
有穀生然要須種等尔乃得成汝言無得解
脫是事不然得真智故諸業滅盡猶如焦種
不能復生故無解脫過有諸所生法皆以業
爲本若無業本云何能生又万法之生各有
定分如此法必從是人身生不在餘身若無
本業云何如是決定差別問曰若法但從因
生如從豆生豆有何咎耶荅曰是事亦以業
爲本以得豆業因緣故從豆生豆何以知之
上古時人行善行故粳米自生故知業爲本
故從豆生豆問曰是衆生數物則從先業生
荅曰不然非衆生數物亦以業爲本一切衆

生有共業果報謂得任處以業因緣故有地
等以得明業因緣故有日月等當知物生皆
以業爲本問曰若生法皆以業爲本有爲無
漏云何荅曰亦以業爲本所以者何皆是先
世布施持戒等力之所由是故亦從業等生
問曰若無漏法亦從業生是亦名繫法是則
不可以經中說有不繫受故荅曰無漏法以
眞智爲因以業爲緣因力大故名爲不繫問
曰何業受欲界報何業受色界報無色界報荅
曰若在欲色無色界起十不善業則於欲界受
報問曰若在色無色界亦能起不善業耶荅
曰彼中能起不善業經中說彼中有邪見邪

見非善乎問曰彼中邪見是無記非不善也
答曰非無記何以知之佛經中說邪見是苦
惱因邪見人所起身口意業有所造作皆爲
苦報猶如苦瓠所有四大盡爲苦味如欲界
邪見不善色無色界亦以此相故名不善以
相同故如婆伽梵志語諸梵言汝等勿詣瞿
曇沙門我於此間能度脫汝是心口不善在
色界起又餘梵天於彼難佛如是等又人在
色無色界謂是泥洹臨命盡時見欲色中陰
即生邪見謂無泥洹謗無上法故云何非不
善耶以此等故當知彼中有不善業問曰若
於彼中起不善業是業爲何處繫答曰若是不

善業受欲界果報故繫在欲界善業有上中
下下者受欲界報中者色界報上者無色界
報又有人言四禪所攝善業受色界報四無
色定所攝受無色界報餘散亂心起業受欲
界報問曰云何彼中起善業欲界受果報答
曰如此間攝心起善業彼間受報如是彼中
散亂心起善業此間受報又如色無色界起
不善業欲界中受報彼中善業亦如是問曰
若在色無色界不能起欲界繫善業答曰是
中無此因緣若在欲界能起色無色善業在
色無色界不能起欲界善業耶又汝等說在
色界中能生欲界無記心若能生無記心何

故不能生善心耶又經中佛語手天子當念
住心受塵想塵想即是欲界繫心是人隨以
善心聽法禮佛皆是欲界繫心若不介者不
名塵想又是中求念財福如說世尊我於三
事無厭足故此間命終生無熱天謂見佛聽
法供養僧求念財福是欲界繫心又此中有
念佛等非財福故當知有欲界繫善

三報業品第一百四

問曰經中佛說三種業現報生報後報業何
者是耶荅曰若此身造業即此身受是名現
報此世造業次來世受是名生報此世造業
過次世受是名後報以過次世故名爲後問

曰中陰報業在何處受答曰二處受次第中
陰業在生報處受以生有差別名中陰故餘
中陰業在後報處受問曰是三種業為報定
耶世定耶答曰有人言報定現報業必現受
報餘二亦尔雖有此言是義不然所以者何
若尔者非但五逆名為定報而六足阿毗曇
說五逆是定報又監兩經中亦說不定有業
應受地獄果報是人修身戒心慧故能現受
報是故此三種業應當世定現報業不必現
受若受則應現受非餘處餘二亦如是問曰
何等業能受現報答曰有人言利疾業受現
報如於佛諸聖人及父母等起善惡業是則

現報若業不利而重是則生報如五逆等亦
利亦重則受後報如轉輪王業若菩薩業又
有人言是三種業隨願得報若業願今世受
是即現受如末利夫人以自食分施佛願現
世爲王夫人餘二業亦如是有隨業熟則先受
問曰過去業去何名熟荅曰具足重相是名
爲熟問曰頗有一念起業次念受報耶荅曰
無也漸次當受如種漸次生芽業法如是問
曰若處胎中及睡眠狂亂等人能集業不荅
曰此等有思則能集業但不具足問曰若離
此地欲能起此地業不荅曰有我心人皆集
此業若離我心則不復集問曰阿羅漢亦禮

敬修福等此業何故不集耶荅曰以衆生心
故諸業則集阿羅漢無我心故諸業不集又
阿羅漢心無漏無漏心者不集諸業又經中
說斷罪福業名阿羅漢是人
不集罪業福業
及不動業故業受畢新業不造問曰學人集
諸業不荅曰亦不集也所以者何經說是人
散壞諸業不積不集滅不然等有論師言是
學人有我慢故諸業亦集但以無我智力不
必受報問曰是三種業於何界可造荅曰三
界中一切處可造問曰不定業有耶無耶
荅曰有若業或現報或生報或後報是名不
定如是業多問曰若知此三種業得何利耶

答曰若能分別是三種業則生正見所以者
何現見有惡行者而受富樂善者受苦於中
或生邪見謂善惡無報若知此三業差別則
得正見如說偈行惡見樂為惡未熟至其惡
熟自見受苦行善見苦為善未熟至其善熟
自見受樂又分別大業經說不斷殺者得生
天上是人若先世有福將命終時發強善心
能如是知則生正見是故應知此三種業相
三受報業品第一百五

問曰經中佛說三種業樂報苦報不苦不樂
報業何者是耶答曰善業得樂報不善業得
苦報不動業得不苦不樂報此業不必定受

若受則受樂報非苦等餘二亦尔問曰是諸業亦得色報何故但說受耶答曰於諸報中受為最勝受是實報色等為具又於緣中說受如說火苦火樂或有因中說果如人施食名施五利亦如言食錢等問曰從欲界至三禪中得受不苦不樂報耶答曰得受問曰是何業報答曰是下善業報上善業則受樂報問曰若尔何故第四禪及無色定中說耶答曰彼是自地所以者何彼中但有是報更無異受以寂滅故問曰有人言憂非業報是事云何答曰何故無耶問曰憂但從想分別生業報不應是想分別故又若憂是業報業報則輕

故非報耶又此憂離欲時斷業報離欲時不斷是
故憂非業報答曰汝言憂從想分別生故非報
者樂亦是業報是樂二種一樂二喜亦從想
分別生不應名報汝言業報則輕是憂重過
於苦所以者何憂是愚人所有智者則無是
故難除亦能深生熱惱又四百觀中說小人
身苦君子心憂又此憂要以智斷身苦樂亦
能除又憂能生三世中惱所謂我先有苦今
苦當苦又憂是諸煩惱住處如經中爲煩惱
處故說十八意行以五識中不生煩惱故
又經中說以憂爲二箭以受苦重故如人一
處重被二箭則受苦倍增如是癡人爲苦所

逼更增憂患以惱身心故甚於苦也又愚者
常憂所以者何是人恩愛乖離怨憎合會所
求不得等故常憂惱又此憂從二因生一從
喜生二從憂生若失所愛物是從喜生如經
中說佛問波斯匿王汝愛迦尸憍薩羅國耶
又說諸天樂色貪色是色若壞則生憂惱是
名從喜生從憂生者從所憎事生亦從嫉妬
等生未離欲者嫉妬等結常惱其心如說天
人多慳嫉結又多衆生憂惱他人故得憂惱
報如說隨種生果故知憂是業報汝言離欲
時斷故非報者是事不然須隨洹未離欲亦
斷地獄等報可以地獄等報為非報耶故不

可以離欲時斷便名非報問曰不苦不樂報業名不動此業是善應受樂報何故受不苦不樂報耶荅曰是受不動故實樂以寂滅故名不苦不樂又經中說樂受中貪使彼中貪於彼受中使知是樂也

三障品第一百六

問曰經中說三障業障煩惱障報障何者是耶荅曰若諸業煩惱及報能障解脫道故知名曰障問曰何者能障荅曰施戒修善迴向三有此能障道又定受報業是亦為障如經中說若此人必定集受報業則不入正位是名業障又若人煩惱厚利增上常在心中是

煩惱障又若人煩惱不可除遣如不能男等
欲亦名煩惱障又若地獄等罪惡生處及隨
所生處不能修道皆名報障問曰有人不先
明悉前人不知其善則不布施謂彼人若由
我施得造諸惡我則有分如梵志等諸出家
人故出家人不應布施以新業繫障解脫故
答曰不然他作罪福於我無分所以者何罪
福因緣中有多過咎何者如衆生是殺因緣
若無衆生何所殺耶然則死者應當有罪又
如富者是盜因緣美色是邪淫因緣他人是
妄語等因緣僞稱等是欺誑因緣買者亦應
有罪又受者爲施者因緣亦應得福若人造

井池等用者皆應得福然則不應自為福德而實不然是故因緣中不應有罪福又受者福分應當消盡則人不應從他受施所以者何以福德分賀飲食故有施者應罪多而福少所以者何詐有幾所婆羅門能為善者多以三毒濁心深著五欲不勤修善是故施者應罪多福少又梵志等自稱善人修行法者是人不能正觀諸法禪定攝心若離禪定心難調伏是故施者施未離欲人應得罪多又人供養父母供給妻子親屬知識皆應得罪則無有人得福分者而實不然是故罪福不在因緣中又持戒等法亦利益他是人不殺

生故施一切命則持戒者得大罪分以不殺
故前人得壽所作衆惡盡應是持戒者分不
求福者便當殺生不應持戒又人說法令他
修福修福因緣後得富貴富貴則憍逸憍逸
則造諸惡此諸惡說法者皆應有分又施因
緣令他人富以富因緣所作諸罪亦應是施
者分然則梵志不應受施亦不應與而今梵
志但受不與故知此爲邪道又如諸王如法
治民亦應有罪又若子爲罪而父母有分則
應不生子又良醫療疾亦應得罪以其得命
爲諸罪故又天降雨時生長五穀天應得罪
以濟育惡衆生故又施食者亦應得罪受者

或食不消乃令至死亦未離欲人以著味故
施者應罪然則施者常應令受者自立誓言
今食汝食要不為惡然後當與若不如是則
施者兩失問曰經中亦言若比丘食檀越食著
檀越衣入無量定以是因緣故此檀越得無
量福若以是因緣而得福者云何不得罪耶
荅曰若是比丘食檀越食著檀越衣入無量
定檀越施福自得增長不得定福如田良故
所收必多薄則收少如是福田良故施報則
大薄則福少不以受者為福為罪而施者得
分是故不以罪福因緣而得罪福彼雖為因
緣而罪福要由自起三業問曰未離欲人心

不自在必貪著有故出家人不應行施答曰
若尔則出家人持戒等皆有福德是亦應捨
而實不可是故布施亦不應捨但勿迴向三
有當爲泥洹又但應遠離煩惱諸不善業所
以者何是諸業因時可防果時無可如何是
故諸佛常於因時教化說法不如閻王於果
時方化訶責問曰是三業障中何障最重答
曰有人言報障最重以不可化故有人言以
隨人故一切皆重問曰何者可轉答曰皆可
令滅若可轉者不名爲障

四業品第一百七

問曰經中佛說四種業黑黑報業白白報業

黑白黑白報業不黑不白無報業為滅盡諸
業故何者是耶答曰黑黑報業者隨以何業
生苦惱處如阿鼻地獄及餘苦惱無善報處
若畜生餓鬼少分與此相違名第二業隨以
何業生無苦惱處如色無色界及欲界人天
少分黑白雜名第三業隨以何業生苦惱不
苦惱處若地獄畜生餓鬼人天少分第四業
名無漏能盡三業若業二世所呵今呵後呵
是人為罪墮在黑闇無有名聞故名為黑又
二世苦毒今苦後苦故名為黑問曰是業何
者能生純苦惱處答曰相次為惡心無有悔
間無有善能消惡業是名能生純苦惱處又

以邪見心而造諸惡又於重人爲惡所謂父母及餘善人又於衆生爲惡無所遺惜如殺衆生若盡奪財物若閉牢獄而復斷食若重拷掠令無餘樂如是等業生純苦處白白報業者若人純集諸善無有不善此二業勢力最大餘無能勝若受黑業報時不容白報受白業報時不容黑報所以者何一切衆生皆集善不善業力相障故不得並受如負二人物強者先牽第三業弱善不善雜故並受報于相勝故問曰有人言若不善業受惡道報是名初業色界繫善名第二業欲界繫人天中雜受報業是名第三業無礙道中十七學

思是第四業此義云何答曰佛自說此業等
相謂若人起罪身口意行受苦惱身生苦惱
處所受諸受皆不隨意故知隨令衆生生純
黑苦處是名初業色無色界則純受樂欲界
天人亦有純受樂者如經說有樂人亦有六
觸人天所覺諸塵無不隨意是第二業黑白
雜行是第三業一切無漏業皆爲盡諸業以
相違故非但十七學思名第四業問曰無漏
實白何故名不白耶答曰此白相異不同第
二業白是白最勝無相待故如說轉輪聖王
成就清淨過人天眼實是人眼勝餘人故名
曰過人此業亦亦勝餘白業故說不白又有

人言應說名非黑白報業此則無過又泥洹
名非白是故此業應名非白又亦應說非黑
非白所以者何泥洹名無法此業為泥洹故
名不黑不白又世間貴重有漏善業故名為
白以第四業能捨此業故名不白又此業無
黑相故亦無白相可得又報白故業名白是
業無報故不名白

五逆品第一百八

次身受報故名無間若現受則輕苦惱報少
以其重故次第疾墮阿鼻地獄三逆由福田
德重故名為逆所謂破僧惡心出佛身血殺
阿羅漢殺父母以不識恩養故名為逆此逆

罪但人道中能起非餘道中以人有別知故
問曰殺餘聖人得逆罪不荅曰殺聖人者多
墮地獄若殺阿羅漢必應當墮若人打佛而
血不出亦得重罪以欲害世尊故問曰若人
作一逆罪則墮地獄若作二三亦於一身盡
受報不荅曰是罪多故久受重苦於是中死
還生是中問曰破僧罪中云何爲重荅曰若
非法知非法是法知是法如是心作則名爲
重若非法謂法法謂非法是不如先又若人
於佛所破僧自稱大師天人中尊是亦爲重
問曰若凡夫可破非是聖人何名重罪荅曰
障礙正法故名重罪問曰破僧法爲幾時荅

曰法不久住不經一宿是中梵王等諸天舍
 利弗等諸大弟子即還和合有人言是五百
 比丘先世障他得道善根因緣今得此報又
 凡夫人心輕躁故易可破壞若但得世間空
 無我心尚不可破況無漏耶以惡欲在心故
 造破僧因緣故求福者應捨惡欲

成實論卷第八

西

反皆	道	反尤	逕	成
推	類	劇	前	實
打	徒	下	上	論
追	回	其	古	卷
上	刺	坑	違	第
直	棘	陷	馱	八
溢	上	下	下	
夷	七	咸	唐	
一	賜	字	賞	
睹	反	梗	音	
犬	投	杭	誘	
上	淵	二	音	
猪	下	同	屠	
苦	烏	稻	獵	
瓠	反	粟	上	
下	高	上	音	
音	崖	音	徒	
匿	下	輒		

王 上力反 尼 上力反 質 二同 莫 候 詎 巨 衣 檀 上去聲 撈 去聲
 上音考 下音略 質 許器反 詎 巨 衣 檀 撈
 肥壯 良及

